

# INUIT ATAQATIGIIT INATSISARTUNI



UPA 2016/ 82  
Agathe Fontain  
20. april 2016

**Inatsisartut aalajangiiffigisassaattut siunnersuutigineqarpoq Naalakkersuisut peqquneqassasut Peqqinnissaqarfiup aqunneqarnera, aqqissuussaanaera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. November 2010-meersup § 3, imm. 2 naapertorlugu kingusinnerpaamik 2017-imi, Naalakkersuisut tarnip pissusaanik ilisimasallit peqqinnissaqarfiup iluani, pisortat oqartussaasuini allani namminer-sortunilu ilinniakkaminnut tunngasutigut sulinerat pillugu malittarisassanik erseqqinnerusunik aalajangersaanissaat.**

(Inatsisartunut ilaasortaq Steen Lyngé, Atassut)

Steen Lyngé, Atassut qutsavigaarput oqaluuserisassamik pisariaqartumik oqaluuserisassanngortitsisimammat. Siunnersuut taperserparput.

Inatsisartut Inatsisiliorsimatillugit akuerineqartunik, Naalakkersuisuusoq sulianut nangitsinissanut pisussaaffeqalersarpoq. Inatsisip nalunaarutitaa suliassaralugu. Una siunnersuut pisariaqalersimavoq Inatsit 2010-meersoq pineqartoq atuutilernerata kingorna, suli nalunaarutitaa naammassineqarsimangimmat.

Siunnersuuteqartoq Steen Lyngé ilumoorpoq, taaguut Tarnip pissusaanik ilisimasalik (Psykolog) Nunatsinni illersugaanngilaq. Nalunaarutikkut ersarissarneqanngimmat, taamaalilluni innutaasoq kinaluunniit, taamatuttaaq tarnip pissusaanut sulisoq kinaluunniit, illersugaanngitsutut taasariaqarput. Innuttaasormi kinaluunniit katsorsarneqarnerminut illersugaasariaqarpoq, ileqqussanik malinneqartussanik pigisaqarnikkut.

Katsorsarneqarneq imaannaanngitsuvoq, inuk katsorsarneqartoq "qulaarneqartarpoq" kukkusumik katsorsaasoqartillugu innarlerneqarsinnaalluni.

Steen Lyngé isumaqatigaarput aamma Tarnip pissusaanik ilisimasalik illersorneqarsinnaasariaqarpoq taamaalilluni pineqartut illugit tamarmik illersugaassapput.

Nalunaarummik suliassaq suliassat tulleriutaarneranni suliassani tamani pingaarnerit ilaannut inissinneqartariaqarpoq 2017-milu sapinngisaaq tamaat piaarnerpaamik naammassineqartariaqarluni. Qanorluunniit nakkutilliinissamik maalaarsinnaatitaanermillu suliassartai pisariutigigaluarpata.

Siunnersuut aappassaaneeraneqannginnermini Ilaqutariinnermut Peqqissutsimullu ataatsimiititaliamut ingerlatinneqarnissaa innersuussutigaarput.